

**Kalaallit Nunaanni illunut inissianullu Radon-ip qinngorneranut
illersuutilersuinissamut periarfissanik misissuititsinissamut Naalakkersuisut
peqquuneqarnissaannik Inatsisartut aalajangiiffigisassaattut siunnersuut. Misissuinerup
imarissavaa pisortat ingerlataanni illuni aamma nammineq illuni inissianilu pisortanit
pigineqartuni arlalinni periarfissarsiorissaq. Kingusinnerpaamik 2023-mi ukiaanerani
ataatsimiinnermi misissuinermit innersuussutit saqqummiunneqassapput.**

(Inatsisartunut ilaasortaq, Mariane Paviaisen, Inuit Ataqatigiit)

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Anders Olsen, Siumut
Inatsisartunut ilaasortaq Jens Kristian Therkelsen, Siumut

UKA 2022-imi ulloq 16. November 2022-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Illunut inissianullu Radon-ip qinngornerata annertunerulinnginnissaa qulakkeerniarlugu misissuititsinissaq siunnersummi siunertarineqarpoq.

Siunnersuutip Inatsisartunit siullermeerneqarnera

Siullermeerinninnermi allannguutissatut siunnersuutit tulliuttut Naalakkersuisunit saqqummiunneqarput:

”Naalakkersuisut inissiani nammineq pigisani radon-imut isumannaallisaanermut atatillugu aningaasartuutissanut taarsigassarsitsinissamut periarfissanik

pitsannguinissamik peqquneqarnissaat, tamatumalu inissianut aningaasalersuisarnermut inatsisip iluarsaanneqarnerani tullermi, kingusinnerpaamik 2023-mi upernaakkut pisussami ilanngunneqarnissaa pillugu Inatsisartut aalajangiiffigisassaattut siunnersuut.”

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Siunnersummi siunnersuutip aningaasatigut kingunerisassai allaaserineqartut, taamaalilluni naatsorsuutigineqartoq AC-fuldmægtigitut atorfillip sulinera ukiut marluk sinnernavianngikkai naatsorsuutigineqartoq ataatsimiittitaliamit maluginiarneqarpoq. Ataatsimiittitaliaq tassunga oqaaseqaatissaqanngilaq.

Ataatsimiittitaliap siunnersummik suliarinninnera

Pisortat ingerlataanni illuni aamma nammineq illuni inissianilu pisortanit pigineqartuni Radon-ip qinngorneranut illersuutilersuinissamut tapiissuteqarfingineqarnissaq periarfissaareersoq Naalakkersuisunit isummerfigineqarnera ataatsimiittitaliamit maluginiarneqarpoq.

Aammalu Naalakkersuisut allannguutissatut siunnersuutaanni piffissaliussamut tunngatillugu naapertuutinngitsoqartoq ataatsimiittitaliamit maluginiarneqarpoq. Danskisuuan allassimavoq inatsit 2023-mi ukiakkut ataatsimiinnissamut saqqummiunneqassasoq, kalaallisuuani allassimalluni inatsit 2023-mi upernaakkut ataatsimiinnissamut saqqummiunneqassasoq.

Ataatsimiittitaliap inassutai

- Ataatsimiittitaliaq isumaqtigiiittoq allannguutissatut siunnersummik imaattumik saqqummiussivoq taassumalu akuerineqarnissaa inassutigalugu:

”Naalakkersuisut inissiani nammineq pigisani radon-imut isumannaallisaanermut atatillugu aningaasartuutissanut taarsigassarsititsinissamut periarfissanik pitsannguinissamik peqquneqarnissaat, tamatumalu inissianut aningaasalersuisarnermut inatsisip iluarsaanneqarnerani tullermi, kingusinnerpaamik 2023-mi upernaakkut pisussami ilanngunneqarnissaa pillugu Inatsisartut aalajangiiffigisassaattut siunnersuut.”

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

Kristian Jeremiassen

Siulittaasoq

Siverth K Heilmann

Siulittaasup tullia

Harald Bianco

Anders Olsen

Jens Kristian Therkelsen